

**VRHOVNI SUD  
FEDERACIJE BOSNE I HERCEGOVINE  
KOMISIJA ZA JAVNE NABAVKE  
Broj:070-0-Su-22-000369  
Sarajevo, 09.06.2022. godine**

Na osnovu člana 68. stav (4) tačka (i), člana 69. stav (2) tačka (d), člana 70. stav (1) Zakona o javnim nabavkama Bosne i Hercegovine („Službeni glasnik BiH“ broj: 39/14) i člana 31. Pravilnika o nabavci roba, vršenju usluga i ustupanju radova Vrhovnog suda Federacije BiH, a na preporuku Komisije za provođenje postupka javne nabavke robe – namještaja za potrebe Vrhovnog suda Federacije BiH putem konkurentskog zahtjeva, predsjednica Vrhovnog suda Federacije BiH donosi:

**ODLUKU  
o poništenju postupka javne nabavke robe– namještaja za potrebe Vrhovnog suda  
Federacije BiH.**

**Član 1**

Prihvata se preporuka Komisije za javnu nabavku broj: 070-0-Su-22-000369 od 06.06.2022. godine i poništava se postupak javne nabavke robe - namještaja za potrebe Vrhovnog suda Federacije BiH iz razloga što ponude ponuđača R&S d.o.o Sarajevo i ponuđača INTER-COM d.o.o. Zenica ne ispunjavaju zahtjeve iz tenderske dokumentacije, a u skladu sa članom 68. stav (4) tačka (i) i članom 69. stav (2) tačka (d) Zakona o javnim nabavkama („Službeni glasnik BiH“ br. 39/14).

**Član 2.**

Ova Odluka će se objaviti na web stranici Vrhovnog suda Federacije BiH, istovremeno sa upućivanjem ponuđačima koji su učestvovali u postupku javne nabavke, u skladu sa članom 70. stav (6) Zakona o javnim nabavkama BiH.

**Član 3.**

Ova odluka stupa na snagu danom donošenja.

**O b r a z l o ž e n j e**

Dana 23.05.2022. godine, Komisija za javne nabavke Vrhovnog suda Federacije Bosne i Hercegovine, javno je otvorila ponude, koje su dostavljene u konkurentskom postupku sa objavljivanjem tenderske dokumentacije na portalu Agencije za javne nabavke Bosne i Hercegovine (broj obavještenja: 751-7-1-27-3-4/22), za izbor ponuđača tehnički zadovoljavajuće ponude sa najnižom cijenom, za nabavku roba – nabavka namještaja za potrebe Vrhovnog suda Federacije BiH. Prilikom otvaranja ponuda pristiglih u predmetnom postupku, otvorene su ukupno 2 (dvije) pristigle ponude i to ponude ponuđača INTER-COM d.o.o. Zenica i R&S d.o.o Sarajevo.

Komisija je na zatvorenim sjednicama dana 01.06. i 03.06.2022. godine, izvršila evaluaciju pristiglih ponuda gore pomenutih ponuđača za nabavku roba – nabavka namještaja za potrebe Vrhovnog suda Federacije BiH.

Uvidom u ponude ponuđača INTER-COM d.o.o. Zenica i R&S d.o.o Sarajevo, Komisija se izjašnjava kako slijedi:

Ponude oba ponuđača u pogledu dostavljene dokumentacije su u skladu sa traženim iz tenderske dokumentacije, tj. dostavljeni su svi potrebni dokumenti, pa su u tom pogledu ponude ponuđača INTER-COM d.o.o. Zenica i R&S d.o.o Sarajevo potpune.

Međutim uvidom u uzorke dostavljene od oba ponuđača tj. ponuđača INTER-COM d.o.o. Zenica i R&S d.o.o Sarajevo, ustanovljeno je da isti ne odgovaraju karakteristikama/specifikacijama traženim u tenderskoj dokumentaciji.

Naime, tačkom 12.3. uslovi pod c) tenderske dokumentacije za konkurentski zahtjev za nabavku roba – nabavka namještaja, propisano je: “dostaviti uzorke predmeta nabavke”. Nadalje, u dijelu “PODACI O PONUDI”, tačka 13. “Sadržaj ponude i način pripreme ponude” napomenuto je da: Ugovorni organ će na osnovu dostavljenih uzoraka i priložene dokumentacije izvršiti provjeru da li ponuđena roba sadrži minimalno zahtijevane karakteristike iz tehničke specifikacije. Ocjena dostavljenih uzoraka: Komisija za javne nabavke Ugovornog organa će na osnovu dostavljenih uzoraka provjeriti da li odgovaraju minimalnom opisu iz tehničke specifikacije i to u pogledu da li opis dostavljenih uzoraka odgovara opisu predmeta nabavke koji je zahtijevan i naveden u tehničkoj specifikaciji i prostim poređenjem izvršiti ocjenu svih parametara u smislu da li uzorci odgovaraju karakteristikama - opisu zahtijevanih stavki. Komisija će na osnovu uzoraka provjeriti da li odgovaraju opisu iz tehničke specifikacije kao i dostavljenim tehničkim listovima/katalozima i to samo u dijelu koji su lako provjerljivi, sa postupcima kako slijedi: Mjerenjem dimenzija; Vizuelnim pregledom; Zapažanjem ostalih zahtijevanih karakteristika iz tehničke specifikacije po pojedinim stavkama. Ponuda ponuđača koji istovremeno sa ponudom ne dostavi sve tražene uzorke ili dostavi uzorke koji ne budu u potpunosti odgovarali zahtijevanom opisu iz tehničke specifikacije, će biti ocijenjena kao neprihvatljiva. Nakon završenog postupka javne nabavke i potpisivanja ugovora uzorci će biti vraćeni ponuđačima koji su predali ponudu. Ponuđači su dužni sami preuzeti dostavljene uzorke.

Pored navedenog u obrascu za cijenu ponude – prilog II, a koji čini sastavni dio predmetne tenderske dokumentacije detaljno su navedene karakteristike i opis tražene kancelarijske stolice – fotelje i to kako slijedi:

Kancelarijska stolica – fotelja (stilska) sa sljedećim karakteristikama:

- Kancelarijska stolica – fotelja (stilska) sa mekanim tapaciranim sjedištem i naslonom za leđa presvučena prirodnom kožom crne boje bez naslona za glavu.

-Stolica treba biti podesiva po visini pneumatskim liftom i podesiva po nagibu naslona pod uglom.

- Stolica posjeduje drvenu petokraku bazu sa točkicama kao i drvene fiksne ruko naslone koji povezuju sjedalo i naslon stolice. Drvena baza stolice i ruko nasloni trebaju biti u boji oraha. Točkici trebaju biti crne boje.

- Dimenzije stolice su: visina min 95 cm, širina sjedala 54 cm, visina naslona 52 cm, dubina sjedala 50 cm.

- Minimalna težina koju stolica može podnijeti je 120 kg.

- Materijal kojim je presvučena stolica je prirodna koža crne boje.

Prilikom pregleda dostavljenih kancelarijskih fotelja – stolica, od strane Komisije utvrđeno je da iste ne odgovaraju traženom u tenderskoj dokumentaciji iz razloga što dimenzije istih nisu u skladu sa tehničkim specifikacijama utvrđenim u pojedinačnim stavkama.

Naime, prevashodno je potrebno napomenuti da su oba ponuđača tj. INTER-COM d.o.o. Zenica i R&S d.o.o Sarajevo u sklopu svoje ponude dostavili gotovo identičan uzorak kancelarijske fotelje – stolice za predmetnu nabavku. Tačnije, stolice prilikom vizuelnog pregleda izgledaju apsolutno identično, u pogledu strukture, dizajna, boje kože, drvenih dijelova stolice i točkića, štepa na naslonjaču i sjedištu stolice, dok ipak postoje određena odstupanja u pogledu dimenzija, a što je utvrđeno prilikom mjerenja dimenzija stolice od strane Komisije.

I. Kada je u pitanju stolica ponuđača R&S d.o.o Sarajevo detaljnim mjerenjem od strane Komisije utvrđene su sljedeće dimenzije kancelarijske fotelje - stolice: visina stolice 107 cm, širina sjedala 51 cm, visina naslona 66 cm i dubina sjedala 47 cm. Međutim ove dimenzije nisu u skladu sa traženim u tenderskoj dokumentaciji. Naime, tenderskom dokumentacijom tražene su sljedeće karakteristike u pogledu dimenzije kancelarijske fotelje – stolice: Visina minimalno 95 cm, širina sjedala 54 cm, visina naslona 52 cm i dubina sjedala 50 cm. Dakle, jednostavnom usporedbom traženih karakteristika (dimenzija) sa onim karakteristikama (dimenzijama) do kojih je Komisija došla detaljnim mjerenjem stolice može se nedvojbeno zaključiti da ponuđeni uzorak kancelarijske fotelje – stolice ne odgovara traženom u pogledu dimenzija koje se odnose na širinu sjedala ( traženo 54 cm , a ponuđeni uzorak je širine 51 cm), visine naslona ( traženo 52 cm , a ponuđeni uzorak je visine naslona 66 cm ) i dubine sjedala (traženo 50 cm , a ponuđeni uzorak je dubine sjedala 47 cm). U prilog iznesenoj tvrdnji govori i činjenica da (pored uvida u i mjerenja dostavljenog uzorka) iz tehničke specifikacije za dostavljeni uzorak, na stranici 25. ponude ponuđača su tačno definisane karakteristike stolice, zajedno sa njenim predviđenim dimenzijama. Uvidom u navedenu specifikaciju dimenzije stolice su naznačene kako slijedi: visina 107 cm, širina sjedala 52 cm, visina naslona 64 cm i dubina sjedala 48 cm. Dakle, iako navedena specifikacija ne korespondira sa stvarnim dimenzijama izmjerenim od strane Komisije, i iz specifikacije ponuđača R&S d.o.o. Sarajevo vidljivo je da karakteristike uzorka ponuđene kancelarijske stolice – fotelje ne odgovaraju traženim specifikacijama odnosno karakteristikama iz tenderske dokumentacije i prilogom iz obrasca za cijenu ponude – prilog II.

II. Kada je u pitanju stolica ponuđača INTER-COM d.o.o. Zenica detaljnim mjerenjem od strane Komisije utvrđene su sljedeće dimenzije kancelarijske fotelje - stolice: visina stolice 107 cm, širina sjedala 51 cm, visina naslona 65 cm i dubina sjedala 46 cm. Međutim ove dimenzije nisu u skladu sa traženim u tenderskoj dokumentaciji. Naime, tenderskom dokumentacijom tražene su sljedeće karakteristike u pogledu dimenzije kancelarijske fotelje – stolice: Visina minimalno 95 cm, širina sjedala 54 cm, visina naslona 52 cm i dubina sjedala 50 cm. Dakle, jednostavnom usporedbom traženih karakteristika (dimenzija) sa onim karakteristikama (dimenzijama) do kojih je Komisija došla detaljnim mjerenjem stolice može se nedvojbeno zaključiti da ponuđeni uzorak kancelarijske fotelje – stolice ne odgovara traženom u pogledu dimenzija koje se odnose na širinu sjedala ( traženo 54 cm , a ponuđeni uzorak je širine 51 cm), visine naslona ( traženo 52 cm , a ponuđeni uzorak je visine naslona 65 cm ) i dubine sjedala (traženo 50 cm , a ponuđeni uzorak je dubine sjedala 46 cm).

Imajući u vidu prethodno navedeno, Komisija je mišljenja da ponuda ponuđača R&S d.o.o. Sarajevo i INTER-COM d.o.o. Zenica, koja se odnosi na kancelarijsku fotelju – stolicu ne ispunjava uslove propisane tenderskom dokumentacijom tj. karakteristikama/specifikacijama i dimenzijama koji su detaljno navedeni u prilogu obrasca za cijenu ponude – prilog II koji čini sastavni dio tenderske dokumentacije. Dakle, očigledno je da

ponuđači R&S d.o.o. Sarajevo i INTER-COM d.o.o. Zenica nisu u potpunosti postupili u skladu sa traženim iz tenderske dokumentacije, tačnije dostavljeni uzorci nisu odgovarajućih dimenzija.

Na osnovu utvrđenog činjeničnog stanja, te na osnovu odredbi člana 68. stav (4) tačka (i) i člana 69. stav (2) tačka (d) Zakona o javnim nabavkama ("Službeni glasnik BiH" br. 39/14), Komisija za provođenje postupka javne nabavke dala je preporuku predsjednici Vrhovnog suda Federacije BiH da u predmetnom postupku javne nabavke robe – namještaja, donese **odluku o poništenju postupka nabavke.**

Iz gore navedenih razloga, primjenom člana 68. stav (4) tačka (i), člana 69. stav (1) tačka (b), člana 69. stav (2) tačka (d) Zakona o javnim nabavkama ("Službeni glasnik BiH" br. 39/14) prihvaćena je preporuka Komisije za javnu nabavku i odlučeno je kao u dispozitivu ove Odluke.

#### **POUKA O PRAVNOM LIJEKU:**

Protiv ove Odluke može se izjaviti žalba, najkasnije u roku od pet (5) dana od dana prijema ove Odluke. Žalba se izjavljuje Uredu za razmatranje žalbi Bosne i Hercegovine putem ugovornog organa u pisanoj formi. Žalba se podnosi u najmanje tri (3) primjerka.

Naknada za pokretanje žalbenog postupka plaća se Uredu za razmatranje žalbi, u skladu sa članom 107. Zakona o javnim nabavkama i Instrukcijom Ministarstva finansija i trezora BiH o načinu uplate, kontrole i povrata naknada propisanih članom 108. Zakona o javnim nabavkama BiH.



**Predsjednica**  
**Vrhovnog suda FBiH**  
*Vesna Stanković Cosović*  
**Vesna Stanković Cosović**

#### **Dostaviti:**

1. R&S d.o.o Sarajevo, Igmanska b.b., 71320 Vogošća,
2. INTER-COM d.o.o. Zenica,
2. u dosije javnih nabavki,
3. web stranica Vrhovnog suda Federacije BiH,
4. a/a.